

四庫全書

經部

欽定四庫全書

經部  
四書蒙引卷九

詳校官給事中臣戴璐

刑部郎中臣許兆椿覆勘

總校官編修臣倉聖脈

校對官中書臣葉蘭

謄錄監生臣宋允辰

欽定四庫全書

四書蒙引卷九

明 蔡清 撰

孟子序

芟一條戒九十字

朱子以前孟子只有後漢趙氏一篇題辭及朱子集  
註之成蓋有不滿於題辭者故特於篇首節錄出本  
傳及韓子程子楊氏之言使人讀孟子者開卷之初  
已得孟子之履歷學術之大槩亦提綱挈領之意今  
時初場雖不以命題然二場三場往往有及之者不

可畧也

史記列傳

藏六十九字

漢太史令司馬遷讀其父談書創為義例起黃帝迄  
漢武獲麟之歲撰成十一紀以序帝王十年表以貫  
歲月八書以紀政事三十世家以序公侯中間惟孔  
子布衣七十列傳以志卿大夫士庶孟子列其中也  
上下三千餘載凡為五十二萬六千五百言

趙氏

芟一條

趙岐也字邠卿一字臺卿東漢京兆人首尊信孟子  
為之章旨分為十四篇又為之題辭辭即序也岐每  
好異故獨名題辭此孟子題辭註然也其出處見古  
今紀要

騶亦作鄒本邾國也

按史記本傳註邾後徙於鄒故又稱鄒如魏都大梁  
而稱梁類也

受業子思之門人

芟四條戒十字

依吳氏程註孟子游齊梁時距孔子時一百六十餘  
歲云云見得不是親受業少微鑑載孟軻嘗問牧民  
之道何先子思曰先利之孟子曰君子所以教民亦  
仁義而已矣何必曰利子思曰仁義固所以利之也  
云云此大抵後人所為欲湊成思孟一段授受者耳  
今斷從子思之門人若得親受業於子思不應七篇  
全無所述而曰私淑諸人如此輕他如顏子則曰夫  
子循循云云曾子亦屢曰吾聞諸夫子

索隱云

藏五十六字

索隱者河內司馬貞所為史記索隱也所謂小司馬者自序署為朝散大夫國子博士弘文閣學士但不知為何代人以序文考之蓋唐人也

孔叢子

藏五字

通考晁氏云楚孔鮒字子魚孔子八世孫也仕陳勝為博士以言不見用托目疾而退論註其先仲尼子思子上子高子順之言及已之行事名之曰孔叢子

凡二十一篇叢之為言聚也

道既通

此句亦只可淺說若正經說到道處又非司馬遷見識所能到遷之見只是說他學通相似

趙氏曰孟子通五經尤長於詩書

蓋為見其屢引詩書而以為尤熟於此耳不然何以知其獨長於此後學如此比度前賢其亦無據而可笑無怪乎高子以追蠡而議禹之聲尚文王之聲也



故程子闢之

游事齊宣王宣王不能用

止

不果所言

楚五條減九十五字

古史亦據史記先事齊宣王後乃見梁惠王襄王齊  
湣王獨孟子以伐燕為宣王時事與史記荀子等書  
皆不合而通鑑以伐燕之歲為宣王十九年則是孟  
子先游梁而後至齊見宣王矣然考異亦無他據又  
未知孰是也

此段今斷從黃氏日抄蓋孟子出於所見史記得於

所聞所聞不如所見之真況溫公通鑑又自與史記  
相戾不知溫公生於千載之下又何據而不從史記  
也義理則可斷若事實年次安得夢而知昔人之非  
邪故以孟子所稱齊王而不曰宣王盡為湣王此說  
應是 按史記齊伐燕有二事齊宣王先嘗伐燕燕  
文公卒易王初立齊宣王因燕喪伐之取十城是即  
孟子梁惠王篇所載問答稱齊宣王者也此一事也  
稱宣王者孟子作於宣王已沒之後故以謚稱而趙

岐註亦稱齊宣王也齊湣王後又伐燕燕噲以燕與  
子之齊伐燕下燕七十城是即孟子公孫丑篇所載  
沈同問燕可伐與者也此又一事也止稱齊王者作  
孟子時湣王尚在未有謚之可稱趙岐註亦稱王也  
燕噲遜國在宣王卒後九年湣王伐燕在齊宣王卒  
後十年以此見伐燕噲非齊宣甚明故孟子自公孫  
丑篇後凡涉齊事皆止稱王陳賈作周公未盡仁智  
論終篇只說齊王蓋嘗考究古史通鑑少誤近世師

儒援為王留行事有謂區區齊宣王不足為聖世道  
說者遂亦誤指伐噲為齊宣王事故私記之以俟考  
古者質焉

游事齊宣王宣王不能用云云濶於事情

此言其齟齬於時也

當是之時秦用商鞅止是以所如不合

此言其所以齟齬於時也須以攻伐縱橫字與唐虞  
三代之德字相對看

秦用商鞅

鞅本衛之公族綱目大書衛鞅後封之於商地故又稱商鞅

楚魏用吳起

起初用於魏魏武侯卒奔楚楚君顓辛楚人殺之

齊用孫子田忌

此孫子指孫臏非孫武子也武子則吳王闔閭所用殺二寵妃為隊長者也齊伐魏以田忌為將臏為軍

師威王時

天下方務於合從連衡

楚七條一圖一論移三條入下題

從衡二字之義當主史畧註以義利相合曰從以勢相脅逼曰衡如詩傳南北曰從東西曰衡者不切然當時二字之名所由起則是如詩傳之說也史畧註亦未得其所以然蓋秦居陝西以陝西而視山東諸國東西連亘其勢衡也故以秦而脅六國是主於秦也故曰連衡山東諸國則無西一面只以南北相合

而為從故以六國合約以抗秦所主者六國也故謂之從耳

退而與萬章之徒序詩書

楚一題六條

問詩書既刪於孔子矣孟子又何以序為蓋取孔子所刪定者而序正之孟子嘗曰予未得為孔子徒也予私淑諸人也是時去孔子百餘年則詩書豈能無舛逸失次者邪

史記謂孟子所如不合退而與萬章之徒序詩書述

仲尼之意作孟子七篇韓子曰非軻自著軻既沒其徒萬章公孫丑相與記軻所言焉朱子曰愚按二說不同史記近是

問序說謂史記近是而集註於滕文公篇首章云門人不能悉記其詞又第四章云記者之誤如何曰前說是後兩處失之熟讀七篇觀其筆如鎔鑄而成非綴緝可就也論語便是記錄綴緝所為非一筆文字也清嘗記一書載朱子之言謂孟子一書決是孟



子所自作不是孟子如何寫得精意如此透徹首尾  
如此貫串看他甚麼樣文氣若當時門下有人寫  
得如此意思出亦不可謂軻之死不得其傳矣故曾  
南豐謂書二典亦臯夔輩人所作以公孫丑萬章平  
日所問難於孟子者觀之似未能寫出孟子七篇文  
字如此精粹員活也 新安陳氏謂孟子曰字蓋是後  
人所加者正如周子通書亦為後人每章加以周子  
曰字

韓子曰堯以是傳之舜

共五條

愚謂程子謂韓子此語非是蹈襲前人亦非鑒空撰  
得出許之亦幾於過矣蓋韓子此語全得於孟子見  
知聞知一章此是何等聰明人融會出來便成此一  
段說話 韓子原道述大學平天下必先治國一條  
而遺格物致知蘇氏古史述中庸不獲乎上民不可  
得而治一條而遺夫明善誠身此非其偶遺之也吁  
此韓子之所以止於韓子蘇氏之所以止於蘇氏而

不得以與於斯文也溫公通鑑引孟子立天下之正位行天下之大道却去了居天下之廣居一句此亦是無頭學問也

軻之死不得其傳焉

芟十三條

孟軻之後庶幾焉者只董子一人若文中子也儘有志氣儘有格言只是有些外華魔病吾道以誠實為主況又欲速故作續經這也是器量不可大受矣

荀與揚也擇云云而不詳

芟四條

擇以窮究言語以議論言故以擇為先

又曰孟氏醇乎醇者也

芟二條減末條六字分入上題

謂其擇之精語之詳也

荀與揚大醇而小疵

芟七條一題

大醇以其皆知崇正道黜邪說也小疵即擇焉而不精語焉而不詳也

又曰孔子之道大而能博

芟二條減八字

韓子此言只是謂聖人之道全體之道也當時自顧

曾外諸弟子惟得其性之所近未有能具體者其後  
又各以其所能授弟子源遠而未益分而於道之全  
體愈寥寥矣獨孟軻師子思而子思之學出於曾子  
為得聖道之大全故曰獨孟軻氏之傳得其宗又曰  
求觀聖人之道者必自孟子始正以其得斯道之大  
全正宗為非偏岐末流之學也學者必由是而觀焉  
庶乎其不失耳 問大是就渾淪處說博是就該貫  
處說否朱子曰韓子亦未必有此意但如此看亦是

好 恐韓子見不到此大槩說學而已觀其徧觀盡  
識字面可見 問學焉而皆得其性之所近曰政事  
者就政事上學得文學者就文學上學得德行言語  
者就德行言語上學得蓋以其不能徧觀而盡識也  
求觀聖人之道者必自孟子始

艾一條藏一百二十二字

觀聖道必自曾子之大學始所謂初學入德之門者  
此言只是主孟子言耳亦行遠自邇登高自卑之意  
程子註曰孔子言參也魯然顏子沒後終得聖人

之道者曾子也觀其啟手足之言可以見矣所傳者  
子思孟子皆其學也程子此言不是正改韓子之言  
朱子以其可相發明故附云

又曰揚子雲曰古者楊墨塞路孟子辭而闢之廓如  
也此二句是子雲之言自楊墨行正道廢以下皆  
韓子之言

其大經大法皆亡滅云云爛而不收

其指先王也出韓文集與孟簡尚書之篇此係節文

其本文一則曰先王之法二則曰先王之道三則曰  
先王之事又曰二帝三王羣聖人之道可見 大經  
蓋本中庸之大經上自王朝之間以至父母夫婦房  
閨之內先王莫不制為之禮此皆係五品之人倫事  
如儀禮曲禮所載猶可見其畧也 大法蓋指刑政  
典章之屬如周室班爵祿之制當時孟子已曰其詳  
不可得聞諸侯已去其籍矣至於論井田則亦曰此  
其大畧也亦可見大法之亡滅已多



存十一於千百 芟一條一題

孟子所謂於傳有之者今皆無此書矣可見所存能  
幾

然何無孟氏則皆服左社而言侏離矣

無孟氏則楊墨行正道廢天下皆歸於無父無君之  
教而淪胥於夷矣 衽衣襟也韻府謂裳之交接也  
侏離蠻語不分明之意

故愈嘗推尊孟氏以為功不在禹下者為此也

書云地平天成萬世永賴時乃功則自古功高者莫  
禹若也故特舉禹以推揚孟子之功 新安陳氏曰  
洪水溺人之身異端陷溺人心心溺之禍甚於身溺  
也

或問於程子曰孟子還可謂聖人否程子曰未敢便道  
他是聖人然學已到至處

輔氏曰未敢便道是聖人以其行處言學已到至處  
以其知處言孟子論大而化之之謂聖聖而不可知

之謂神與夫聖知巧力之譬精密切當非想像臆度之所能及是其學已到聖處然其英氣未化有露圭角處故未敢便道是聖人此其權度審矣

程子又曰孟子有功於聖門不可勝言仲尼只說一箇仁字孟子開口便說仁義仲尼只說一箇志孟子便說許多養氣出來只此二字其功甚多

蓋專指養氣二字不必謂義與氣單說氣之一字如何便有功若上云有功聖門則兼仁義與養氣

又曰孟子有大功於世以其言性善也

又曰孟子性善養氣之論皆前聖所未發

慶源輔氏曰言性善使資質美者聞之必求復其本  
然而充其善資質不美者聞之亦知所自警而不流  
於惡言養氣使氣質剛柔不齊者勇猛奮發於道義  
而無巽懦怯弱之弊皆發夫子所未發其功多蓋在  
此此所以有大功於世也

又曰學者全要識時若不識時不足以言學顏子陋巷

自樂以有孔子在焉若孟子之時世既無人安可不以道自任

又曰孟子有些英氣才有英氣便有圭角英氣甚害事新安陳氏曰英氣甚害事蓋責備賢者之辭問孟子英氣害事處安在曰孔子德性較寬大氣象較從容故卑者亦得而親之高者亦愈見其不可及故曰夫子溫良恭儉讓以得之又曰即之也溫聽其言也厲蓋狡詐者獻其誠暴慢者致其恭如飲醇醪令人

不覺自醉譬之春風着物自然能使發生也如此而猶有不入不行處則命也若孟子則不如孔子多矣既是如此則其所以感人者亦未得如孔子矣程子安得不責其備

如顏子便渾厚不同顏子去聖人只毫髮間孟子大賢亞聖之次也

蓋以顏子為大賢亞聖而孟子次之其實把孟子顏子並觀其氣象自有次第但難於口舌論說也料造

詣深者當自會云

或曰英氣見於甚處曰但以孔子之言比之便可見且如水與水精非不光比之玉自是有溫潤含蓄氣象無許多光耀也

芟一條

溫潤含蓄氣象

芟一條

輔氏曰言心聲也德之符也有德者必有言若就言上看得分明則其德無餘蘊矣玉有溫潤含蓄氣象所以為寶人有溫潤含蓄氣象所以為聖其理一也

楊氏曰孟子一書只是要正人心教人存心養性收其放心至論仁義禮智則以惻隱羞惡辭讓是非之心為之端論邪說之害則曰生於其心害於其政論事君則曰格君心之非一正君而國定千變萬化只說從心上來人能正心則事無足為者矣大學之修身齊家治國平天下其本只是正心誠意而已心得其正然後知性之善故孟子遇人便道性善歐陽永叔却言聖人之教人性非所先可謂誤矣人性上不可添一物堯舜所以



為萬世法亦是率性而已所謂率性循天理是也外邊  
用計用數假饒立得功業只是人欲之私與聖賢作處  
天地懸隔

斐二條畧更次序

輔氏曰人能正心則事無足為者此語亦失之太快  
觀大學正心之後於修身齊家治國平天下更有工  
夫在愚謂孟子大人格君心之非一正君而國定豈  
亦太快哉 朱子曰心得其正然後知性之善語若  
有病蓋知性之善然後能正其心心得其正然後有

以知性之為善而不疑耳 輔氏曰自堯舜所以為  
萬世法至與聖賢作處天地懸隔此數語判斷二帝  
三王及漢唐以後為治之道所以不同明白詳盡愚  
謂二帝三王及唐漢以後為治之道所以不同只是  
王霸之分耳看他說天理人欲及計數等字 孟子  
之書所以救世而垂後也當時舉世滔滔皆沒溺於  
功利孟子所以遇人便道性善言必稱堯舜而性之  
所以善堯舜之所以為堯舜者仁義而已矣所以托

始於見梁惠王一章通七篇都是這一泉脉灌注流通

四書蒙引卷九

欽定四庫全書

四書蒙引卷九

明 蔡清 撰

梁惠王章句上

孟子見梁惠王

楚四條一題減一百三十一字更定次序

孟子平生執不見諸侯之義今其曰見梁惠王者陽  
貨先豈得不見之義也集註收惠王三十五年卑禮  
厚幣以招賢者之語 僭稱王註許東陽曰孟子至  
梁時魏尚為侯此章稱之為王乃著書之時追書耳

蓋始各王於其國至徐州之會則王之號通於天下  
矣 綱目周顯王三十三年孟軻至魏梁惠王之三  
十五年也 三十五年齊魏會於徐州以相王惠王  
之三十七年也 史記惠王三十五年註按綱目於  
會徐州以相王之年始書魏惠王一年則此所謂惠  
王三十五年者是始為侯即位時計得此年數不是  
為王之三十五年也為王只一年而薨見綱目周顯  
王三十五年下分註

王何必曰利亦有仁義而已矣

芟十一條藏六十二字

不必說亦有仁義可以益王之國只是對利字言但說到未有仁而遺其親未有義而後其君則自然有以利其國矣此句且莫鑿破他 仁者心之德愛之

理義者心之制事之宜也

註朱子曰心之德是渾淪

說愛之理方說到親切處心之制是說義之體程子所謂處物為義是也事之宜是就千條萬緒各有所宜處說揚雄言義以宜之韓愈言行而宜之之謂義

若只以義為宜則義有在外意思須如程子所言則處物者在心而非外也事之宜雖若在外然所以制其宜則在心也 事之宜是以處得其宜者說不是據事而言據事而言只喚做理不喚做義故事之宜也一句當如此看但以其所以得其宜者出於心故先着心之制一句

上下交征利而國危矣

斐三條

求利自上始其下化之皆求利畢竟其害歸於上仁



義亦自上始其下化之亦皆仁義畢竟其利歸於上  
萬乘之國弑其君者必千乘之家題愚意千乘之  
家左右是千乘之國皆地方千里出車千乘者也入  
則為公卿出則為侯伯其曰家者特對國而言耳君  
臣之別也萬乘之國弑其君者豈必王朝之公卿而  
後可哉幽王之見弑於申侯是已 但此處朱子大  
註分明謂天子之公卿蓋本萬章下天子之公卿受  
地視侯說大抵是要家字端的未可輕疑妄議 路

史國名紀第二十九板云家國之稱抑又不一孟子  
言千乘之家而王制縣內之采邑皆曰國周官朝大  
夫且稱每國是國亦謂之家而邑亦或稱國矣豈非  
公侯卿佐謹度以事其上則全於臣節制以御其下  
則正於君自臣道言之雖國亦家而自君道言之則  
邑亦國邪采邑曰國則卿大夫固可謂諸侯矣所謂  
內諸侯也

萬取千焉千取百焉

戒十六字

此最不可曉且如天子畿內千里只得萬乘其公卿  
諒非只一二人欲每人各取其十之一則萬乘盡矣  
天子又於何而取給愚謂取字之義只是君十卿祿  
之意言以公卿而所取萬乘者得千焉以大夫而所  
取千乘者得百焉大抵臣之於君每十分而取其一  
分只是君取其十臣取其一耳

苟為後義而先利不奪不饜

藏一百二十四字

萬取千焉千取百焉上下之間各安於其分之所當

得所謂義也苟為後義而先利則稱欲以求寧有底極邪必盡取乃已 單言義以義利相對言也兼言仁義亦對利言然該體用之全也 上取乎下下取乎上故曰交征 註上取乎下是已下如何取之於上蓋天地間之利只有此數上求利便着取之於下下求利便着取之於上矣如魯季氏攘奪其君是取之上尅剝其民是取之下大夫雖為君之下猶為民之上也若夫士庶人曰何以利吾身則非取於上而

又將誰取 乘車數也補詹氏道傳曰書孔疏凡出

車一乘則有兩車一正一副一曰輕車甲馬四匹甲

士三人在車上左主射右主刺中主御步卒七十二

人隨之前拒二十四人左角二十四人右角二十四

人共七十五人甲士三人分統二曰重車牛十二

頭炊家子十人固守衣裝五人廐養五人樵汲五人

共二十五人皆所以載兵車者兵車以戰大車以載

輜重兩車總百人 天子之公卿采地方百里註采

官也因官食地故曰采也

未有仁而遺其親者也未有義而後其君者也

堯十三

條補註一句

上文只曰亦有仁義而已而此則又加以未有遺其親後其君者蓋直是要說仁義自有其利也仁義既自有其利於此愈見得又何必曰利 本文仁義字似指在下人言故有君有親孟子只槩就下人說便見得人君躬行仁義而無求利之心則其下化之自

親戴於已也利却歸於上 此言仁義未嘗不利 補  
此利字與上文何以利吾國上下交征利之利不同  
此利是仁義中之利天理之公也故始終是利而無  
害上條所言利是仁義外之利則人欲之私而已故  
不免於害也 細看大註躬行仁義與仁義未嘗不  
利兩箇仁義字與本文仁義字及註中仁者義者字  
不同蓋仁義未嘗不利亦是就人君言非是謂仁者  
自享受親之利義者自享敬君之利也 太史公曰

余讀孟子書註此太史公是朱子稱司馬遷非謂其父太史談也馬遷自叙所稱太史公則其父也父子相繼為太史故俱稱太史公

王立於沼上

減第二條三十字

此字指鴻鴈麋鹿或曰臺池獨不可樂乎曰惠王是顧之而言奈何欲兼臺池言賢者亦樂此乎是指人君之賢者如宣王問賢者亦有此樂乎是指以下賢者孟子對曰云云補南軒曰孟子若答云賢者



何樂乎此則非惟告人之道不當爾而於理亦有未完也今云然則辭氣不迫而理完矣 楊龜山曰世之君子其賢者乎則必語王以憂民而勿為臺沼園囿之觀是拂其欲也其佞者乎則必語王以自樂而廣其侈心是縱其欲也二者皆非能引君以當道惟孟子之言常於毫髮之間剖析利害之所在使人君化焉而不自知夫如是其在朝則可以格君心之非而其君易行矣 不日成之成之急也又追言之曰

方其經始之時王尚戒以勿亟而庶民歡欣踴躍亦自爾其急也所以不日成之臺既成矣臺下有囿也於是遂言王在靈囿云云囿中有沼也於是又言王在靈沼云云詩人語次蓋如此 於物魚躍於嘆美辭此乃民樂之辭與上文麇鹿攸伏正同皆是民樂文王之所有非可謂文王自嘆美其有是魚躍也民反歡樂之指庶民子來不日成之也不是包謂其臺曰靈臺以下

古之人與民偕樂

藏六十五字移不日成之以下入上題

是說平日有恩惠及人治岐之政是也

故能樂也

芟二條藏七十二字移三條入前題

全在民樂其樂上故集註用此句以發揮其義不然亦何以能樂

梁惠王曰寡人之於國也

藏一百十五字

觀惠王自負其盡心恤民而訝其民宜加多而不加多者意亦為歲凶所為人力終無如之何也何也

二字是推在歲凶上去末段集註明曰乃以民不加  
多歸罪於歲凶

填然鼓之

芟四條

鼓字非虛指戰士言也如孫武子傳所謂於是鼓之  
於是復鼓之者一例

不違農時穀不可勝食也

芟一條 戒三十字第一條湊合

農時與農隙不同農時是正治田之時農隙是不治  
田之時依文王之圖方七十里章註云古者四時之

田皆於農隙以講武事則四時皆有農隙不專謂冬也故春有蒐夏有苗秋有獮冬有狩豈必皆至冬乃役之乎曰然則如此註何曰田以講武則四時皆可伺農隙以役民凡有興作則決須至冬也歲十一月徒杠成十二月興梁成註云農功已畢可用民力此正凡有興作不違此時之說也大抵尋常說農時農隙皆就興作上說不要把田獵事來絆他彼特因田獵而一見耳況此主農時言故曰謂春耕夏耘秋收

之時凡有興作云云也興作興徒作事也田獵以講武不與興作之目論理當兼說方是春耕夏耘秋收恐亦舉其大畧邪穀本謂粟故字從禾以黍稷麥菽亦穀屬故謂之五穀又以凡蔬果之類皆可以養人之生也故謂之百穀與

數畧不入洿池

必用四寸之目也洿池二字平看洿地勢自然者池是入所鑿者

斧斤以時入山林

芟一條戒三百八字更定次序

斧斤當有別賈誼治安策曰至於斃髀之所非斤則  
斧之但考之韻書俱無二義正韻引莊子斲鋸制焉  
又劑斷也斧以破之斤以斷之故曰劑斷也 山林  
之分高者為山平而多草木者為林 山林川澤與  
民共之而有厲禁註厲禁厲與禁也非謂嚴禁也周  
禮山虞掌山林之政令物為之厲而為之守禁註物  
為之厲每物有藩界也為之守禁為守者設禁令也

雲峯曰文王治岐澤梁無禁者不禁民之取而有厲禁者禁民之不以時取也養生喪死舉人世之始終也喪讀如字不音去聲喪謂死而喪之也

王道以得民心為本註得民心有道所欲與之聚之既能令其養生喪死皆無憾則民心自不能舍是而他適此亦應前面加多之意當法制未備之時且要安插吾民使得將就生理所以收攝民心使無至於渙散所以為王道之始



五畝之宅

芟四條

二畝半在田曰廬二畝半在邑曰里廬各在其田中而里聚居也春令民畢出在野冬則畢入於邑

雞豚狗彘

藏六十七字

豚稚豕也彘牝豕也狗有三守狗獵狗豢狗此是指豢狗也

百畝之田勿奪其時

民字或有誤

上文不違農時猶未有百畝之制至此方一夫受田

百畝然雖受田百畝而奪其時亦無益矣故又須  
勿奪其時與上文雞豚狗彘無失其時同或謂勿失  
其受田之時者非也

謹庠序之教申之以孝悌之義

芟五條減一百七十九字

庠序指鄉學非謂國學也舉俊秀及凡鄉之民皆教  
之所教之中又以孝弟為重蓋春秋教以禮樂冬夏  
教以詩書無非教也豈特孝弟在所教邪但以此為  
重耳申重也以此為重而丁寧反覆之也既以此

為重則有在所畧者矣集註云既富而又教以孝弟  
特以其所重者而省文言之耳 盡法制品節之詳  
註觀上條註有法制未備字可見法制亦自兼得品  
節了蓋法制固所以品節之也 盡法制品節之詳  
即所以極裁成輔相之道也

狗彘食人食而不知檢

第二條出下題

此即所謂殺人以政者也 狗彘食人食而不知檢  
既有以致人之死塗有餓莩而不知發又無以救人

之死是人之死者我也非歲也今也人死則曰非我也歲也云云

刺人而殺之

楚五條歲四十六字移一條入上題

刺人而使之死便是殺之也非謂既刺而復殺之

則與先王制度品節之意異矣註此句上面須知自

集註下惠王不能制民之產一句起蓋先王在上數

畧不入洿池斧斤以時入山林於此尚為之制惟恐

民用之不繼且又必五十者然後衣帛七十者然後

食肉於人尚為之制惟恐其濫用而無節況於狗彘  
其肯使食人之食乎 初觀惠王之問似若無罪歲  
之意然孟子一聞其言遂得其意於其所謂鄰國之  
民不加少寡人之民不加多何也數字內就見他是  
欲歸罪於歲以為我雖盡心如此然民終不加多意  
者天殃下民而奪之歲人力終莫如之何耳況其所  
問一則曰河東凶二則曰河內凶再不曾省及已之  
政有未善處而一惟歲凶是圖矣觀下章云庖有肥

肉廐有肥馬民有飢色野有餓莩此率獸而食人也  
惠王欲罪歲得乎 當時惠王若遂用孟子之言而  
見之施行必先發倉廩而賑貸以舒目前之急次行  
王道之始事而後及王道之終事耳或者不察只謂  
劈初頭便是不違農時數畧不入洿池斧斤以時入  
山林不知塗有餓莩如何濟得反是迂遠而濶於事  
情且是時通變宜民雖使數畧入洿池斧斤不以時  
入山林亦可也

寡人願安承教

芟二條裁五十二字第二條湊合

按上章孟子之於惠王既曉以小惠之不足以得民  
既備舉王道之始終告之以見其所以得民者在此  
而不在彼末又指其所行之病民者以諷切之惠王  
盖有感於其言至是請於孟子曰寡人願安承教謂  
之安者見其出於中心之誠而無所勉強也凡安字  
多對勉強言 孟子向之所以告者亦既詳矣無用  
贅言矣為惠王計者今日切務惟在除去目下所行

之虐政虐政既除然後王政以施蓋興一利不如除一害凡害之除亦利之興也然以惠王狃於故習猶未知其所為之病民一至此極也故以梃刃二端先發其意

以刃與政有以異乎

芟二條或五十一字

此亦所謂苛政猛于虎者也 既又曰以刃與政有以異乎孟子乃曰王如知此則今日之政當有在更張者矣蓋王之庖則有肥肉矣王之廄則有肥馬矣



且肥肉何從而得肥馬又何從而得豈非厚斂于民  
以養禽獸哉于是民則有飢色矣野則有餓莩矣夫  
因獸病民以至于飢而死是率獸而食人也 獸相  
食一條極言人君以子民之責而反為殘民之事提  
出為民父母字所以動其惻隱之心也作俑一條又  
痛言民之不可殘也

為其象人而用之

楚二條戒一百四十四字

不必說到殺人殉葬之漸只謂天地間難得者人今

作俑者象人以殉葬猶未至於真殺人也然以其用于死地孔子猶惡之況使民飢而死為真虐殺其民者邪甚言不仁也 中古易之以俑蓋世俗人所為非周公之制作也愚謂始為芻靈者其無後乎雖曰畧似人形畢竟是象人也安得全不提為芻靈者之罪而專罪作俑者邪孔子蓋特遇俑而發耳 安成劉氏曰古之葬者有明器但備物而不可用如芻靈亦其類也不幸流俗之弊而至于作俑又不幸而至

於用人然作俑者夫子且以為不仁而謂其無後況  
秦武公既用殉五傳至穆公而又用殉夫子之言反  
似無驗孰知穆公之後二十一傳至莊襄王而呂氏  
之子遂絕嬴氏之統夫始皇不知所監驪山葬後未  
三年而呂氏之祀又絕嗚呼不仁之禍及子孫如此  
愚謂夫子無後之言發于深惡痛絕之情耳不必  
如此求實且穆公後至二十七世始絕殉葬之報亦  
太緩矣又始皇乃不韋之子陰易秦祚縱不殉葬理

亦當絕矣

顧此死者一洗之

戒二十四字

不可謂死者為太子申亦不可謂凡死于戰者是  
指其先人言也此是惠王問計痛切之詞謂晉國當  
我先人時天下莫強焉及寡人之身乃喪敗如此寡  
人耻之所以欲為先人一雪其耻故孟子解之曰地  
方百里而可以王雖敗衄猶可為也莫如為仁耳又  
實之曰仁者無敵何畏乎秦楚之堅甲利兵此一句當

如此說則前後意思都照應矣

地方百里而可以王

藏三十三字畧更次序

地方百里而可以王況以堂堂千里之梁何以見百里可王王如施仁政于民云云 下文四條皆是推明此句之意故註中能行仁政則天下之民歸之者不可說太早 地方之方字不是與地字相連如今之言地方之類乃是海內之地方千里者九之方字也正與方寸方丈之義同纔足之義也又以下篇然

而文王猶方百里起照之愈見從前或以為四方之方者俱謬

王如施仁政於民

變一條裁十四字

省刑罰薄稅歛此二者仁政之大目也註仁政又不止此二者此特其大者耳仁政是統言綱領字也省刑薄歛是仁政裏面事故曰目然仁政先於養民而其事莫有大於此二者又當時切務也故曰大目如關市譏而不征澤梁無禁罪人不孥之類與凡周禮

一書所載大抵皆仁政也 惠王當時病痛之切者  
最是嚴刑重斂故孟子告之以此觀其厚斂於民以  
養禽獸則自不得不嚴刑罰以督促之不然不能辦  
矣此漢武帝之所以不得不用酷吏也

深耕易耨

深耕深於耕也不苟且鹵莽而已易耨易治也如喪  
與其易及易其田疇之易有整辦齊飭之意與深字  
意相類俱是得盡力之意

壯者以暇日修其孝弟忠信

芟二條藏三十七字畧更次序

孝弟以事父兄忠信以事長上分貼可但孝弟可

分貼父兄忠信不可分貼長上長尊而上卑也據

大學章有事君之孝事長之弟則孝弟忠信通說事

父兄長上亦可盡已之謂忠以實之謂信註盡已

以心言以實以行言是以尊君親上而樂於效死

也註尊君親上是屬本文可使制梃一句其即入以

事其父而出以事其長上者緊緊連帶着壯者以暇



日修其孝弟忠信一句出事長上以平時言也尊君親上而樂於效死以有事時言也惟其知尊君親上故樂於效死夫甲兵固非槌之比而秦楚之堅甲利兵又非他國甲兵之比今而云云者民知尊君親上而樂於效死故也

彼奪其民時

戒六字

彼奪其民時止兄弟妻子離散何暇治禮義哉貼此一句自與上文相應而意亦方足奪民時不必謂

是重刑罰厚稅歛然究而言之既奪其民時必非能省刑  
薄歛者彼陷溺其民指奪其民時使不得耕耨云云

夫誰與王敵

芟一條

非敵不過也自不與我為敵如紂之前徒倒戈攻於  
后以北者是也若使彼皆人人致力以敵我我亦安  
能取勝秦楚之堅甲利兵又豈吾梃所得而撻也哉

王請勿疑

戒六十字

勿疑百里可王之言以百里可王之言疑於迂濶故

引仁者無敵之言以實之蓋以仁者無敵之言觀之則百里可王之言信矣故又勉使勿疑也此章主於百里可王仁者無敵之言皆是客詞也大註云百里可王以此而已亦提掇得緊急

孟子見梁襄王

芟二條戒六十三字末二句舊在前

凡聖賢之至於其國而見其君皆是欲觀其動靜以卜吾道之興廢今見襄王氣象如此其不足與有為決矣孟子蓋將去之故出語云云

天下惡乎定

言天下當何所定謂定於誰也孟子答之以為今天下之勢分崩離析如何可定必合於一然後定也今既未有能一之者奈何可擬定於何所乎於是襄王隨問曰孰能一之言當此之時天下諸侯勢均力敵孰能一之也

不嗜殺人者能一之

戒二十五字

此亦觀其時何如在戰國決然如此湯武若不遇桀

紂終身只是諸侯故周公不有天下是以孟子以五六月之旱苗得雨為喻

孰能與之

言當此之時君各民其民民各君其君孰得而歸之也當時列國既各有疆域則各畫地而守之民有欲舍彼趨此似亦難矣必在所禁制也下文沛然孰能禦之正是答此意

誠如是也民歸之

芟二條殘一百十二字更定次序末條湊合

此節重在今夫天下之人牧未有不嗜殺人者及七八月之間旱則苗槁矣二句因襄王不曉而問孰能與之故以其時勢開曉之如此以苗之勃興於久旱之雲雨喻民之樂歸於嗜殺人之中之不嗜殺人者其如是孰能禦之就指苗之勃然興處言誠如是該如有不嗜殺人者則天下之民皆引領而望之矣二句望與歸不同歸扶攜來歸也引領而望且說他得民心之向慕惟其不嗜殺人而天下皆引領

而望之此民歸之所以莫禦也設使其心不吾何則  
未必能遽吾歸而莫禦也此數句斷然是如此看大  
槩自如有不嗜殺人者至誰能禦之不可十分斷故  
大註云天下悅而歸之

齊宣王問曰齊桓晉文之事

芟二條

此章當疊疊看劈初出一王字究其所以王者無他  
保民而王耳又究其所以保民者無他是心足以王  
矣是心足以王如何反其所以及禽獸者而以序行

之老吾老以及人之老幼吾幼以及人之幼天下可  
運於掌也老幼吾老幼以及人之老幼而天下可運  
於掌者如何五畝之宅可以衣帛百畝之田可以無  
飢雞豚之畜可以食肉庠序孝弟頒白不負戴然而  
不王者未之有也蓋其胸中王道素具特隨時酬應  
而覓路以開導之耳吁若使為人臣者論事皆如此  
假遇願治之君豈有不能堯舜其君

齊桓晉文之事可得聞乎



所問在此所志在此也 朱子曰事者營霸之事營  
霸謂經營霸業也以言其事大抵皆先詐力而後仁  
義是故孟子不欲宣王問之 因當時無道其事者  
故後世無得而傳焉惟其無傳故臣亦未之聞也三  
句意相承 王氏若虛曰齊桓救邢封衛養亂為功  
晉文伐衛致楚陰謀取勝二君他事亦多類此

無以則王乎

藏二十六字

大註無已必欲言之而不止也謂必欲孟子言也

王謂王天下之道註道字重對上文桓文之事說

甚矣孟子之善言也梁惠所問在利孟子不言利而言仁義然仁義自無不利也齊宣所問在霸孟子不言霸而言王道然其功效更萬萬於霸也故始也似拂其志終則實有出於意外之望者此孟子之所以為命世亞聖之大才而其辯謂之雄辯與

德何如則可以王矣

德字輕看不必云齊王以王道本於德也只是人君

之德當何如乃可王

若寡人者可以保民乎哉

楚二條藏四字

本意言卿試度吾能保民否也乃不敢質言而謙之  
曰若寡人者豈亦可以保民邪言恐不能保民而王  
也故孟子下文屢屢於不為不能之辨 將以釁鐘

釁本釁却今曰釁鐘則是因鐘之釁而釁之使釁者  
不復釁也作活字看如子有亂臣十人之亂字意

釁却之却與隙義同

若無罪而就死地

芟一條臧三十三字

無罪指人言然則牛豈有罪乎蓋宣王平日惟知人之無罪者使之就死地為可哀以為至所不忍者也一旦見牛之觶觶乃亦覺有似乎此者故不忍而以羊易之也王若隱其無罪而就死地上既言其若人之無罪而就死地則牛無罪而就死地明矣故此承而言之不必用若字也

然則廢釁鐘與曰何可廢也以羊易之

必欲生此牛也天資如此孟子安得不眷眷而日望之

是心足以王矣

芟三條藏一百十九字更定次序

不是愛一牛便足以王天下為有此心在擴而充之則可以王天下矣擴充之實在老吾老以及人之老云云 既曰是心足以王矣足矣又曰百姓皆以王為愛也臣固知王之不忍也何意蓋緣着不忍字要生議論是心不忍之心也不忍於一牛而忍於百姓

乎達之於其所忍仁不可勝用而王道畢矣 不忍  
二字此一章之骨子孟子只得齊宣王吾不忍其觫  
赫一句遂堅執着不忍字一開一闔百方開導要他  
察識而擴充之 百姓皆以王為愛也一句亦甚喫  
緊盖不着此句無以發其論難而啟其察識擴充之  
端 欲王察識於此而擴充之也 註 察識如下文註  
所謂乃知此心不從外得者盖人皆有不忍人之心  
也擴充則須是自親親而仁民自仁民而愛物所謂

反其本而推之有所不忍而達之於其所忍者也  
齊國雖褊小吾何愛一牛亦不消如此說孟子已曰  
臣固知王之不忍也下文何消解剥蓋孟子此三句  
話意思直是欲王察識其本心而擴充之今齊王畧  
不見有察識之意只管答得冷淡來所以孟子又設  
法以開之難之曰王無異於百姓之以王為愛也云  
云欲王反求而得其本心也王又只恁順承將去都  
無合殺孟子乃為之解曰無傷也云云才起得他此

心之所以合於王者一問

王若隱其無罪而就死地則牛羊何擇焉

題上補一王字

夫孟子固知王之不忍也今而曰云云乃亦似以王為愛然者特故為此難欲王反求而得其本心耳設使王能反求而得其本心則如何曰只是認得是見牛未見羊便都了此却是真情也

我非愛其財而易之以羊也

斐一條

是反辭不宜直辭言我若非吝財何故以羊之小易



牛之大所謂是誠何心哉所以宜乎百姓之謂我愛也蓋被孟子難得來迫自迷其何日處心之故所以解不開了只得自伏將去然實則是不忍也非愛也見牛未見羊也 芟一條

見牛之轂轅而不忍殺固是矣然獨奈釁鐘何若但以釁鐘之不可廢而終殺之則一念之仁自我而發亦自我而遏矣今又姑全此牛以行此一念之仁則釁鐘之禮又自我而廢矣故以羊易牛為得其術然

初來齊王之以羊易牛亦未有此巧妙見識亦偶然  
適合於仁術耳孟子意主於開導故為是獎誘之說  
又此事在孟子開導齊宣則云然耳若在聖人則  
自能遠庖厨縱使見之亦不至以其骸醢而改用羊  
也蓋宣王之易羊者仁也聖人之不必易者義也此  
時正用義之時所謂食以時用以禮者若易牛之事  
只可於無心中一行耳如每見每易則於道悖甚矣  
故曰孟子主於開導齊王則云然 惟其見牛未見

羊故以未見之羊而易所已見覿棘之牛使牛與覿鐘兩全而無害此所以為仁術也此仁字就發用上說其本體具於心者用不得術也術謂法之巧者於難處之際而有善處之方是謂之術得術處只在兩全無害上見牛則此心已發而不可遏言不可自沮了決須行得透未見羊則其理未形而無所妨言初未嘗有不忍之心之可過於事何所妨碍謂之理未形以是時未有心可言故曰理而已盖理素具

而心隨感而發者也理亦仁也即所謂性也心則統性情見牛未見羊也則其為不忍而非愛也不待言矣

聞其聲不忍食其肉

聲謂將死而哀鳴也若平時之聲人誰不聞又安得一一不忍食其肉也

是以君子遠庖厨也

斐一條藏二十五字更定次序

君子之於禽獸也至遠庖厨也此因見牛未見羊及

之孟子開導齊王本意不重在此 庖厨庖取烹炰  
之義周禮有庖人厨庖屋也 亦以預養是心而廣  
為仁之術也預養其心即廣其為仁之術也重在預  
字上養之也預則不至有是心而抑遏不得施者矣  
故其仁術自廣 夫子言之題專指仁術一條  
於我心有戚戚焉 莖五條

此句最重所謂乃知此心不從外得者在此蓋前日  
之不忍者此心也今日之戚戚者亦此心也是心固

有不待外求 然猶未知所以反其本而推之 註舉  
斯心加諸彼老幼吾老幼以及人之老幼是所謂反  
其本而推之也皆由近以及遠自易以及難所謂由  
親親推之然後及於仁民又推其餘然後及於愛物  
此在反其本而推之也齊王却未知如此做去故孟  
子又拳拳於今恩足以及禽獸而功不至於百姓者  
獨何與之問

則王許之乎

斐二條

註許猶可也猶言准他說否 推廣仁術則仁民易而愛物難註此仁術猶言仁道不必與上文一例看為上文有難處者故術字重此則泛言耳

老吾老以及人之老云云

芟一條藏三十四字

及人之老自吾老而推之老吾老則自何地而推之曰舉斯心加諸彼而已 天下可運於掌言四海可得而保也天下對上人字天下則盡乎人矣對下文則老幼吾老幼以及人之老幼是推恩天下可運於

掌只保四海故字承舉斯心說來

詩云刑于寡妻云云

芟三條第一條芟七字移入下題

言舉斯心加諸彼而已

芟十一字末條出題

以心對彼而言則寡妻兄弟家邦盡是彼也此一

章心字是骨子詩之所云舉斯心加諸彼也然則

老幼吾老幼以及人老幼者獨非是心所推乎解

詩就揭一心字出應是心字是心也所以老幼吾老

幼者此也所以及人之老幼者亦此也如此則天下



可運於掌是心足以王矣此之謂也

古之人所以大過人者

大過人是以保四海之功業言所以能保四海者惟能推恩而已古之人指二帝三王言心之所加者即恩也以其見於行事故又謂之所為恩及禽獸而功不至於百姓非善推也用恩與推恩何別曰單言親親亦為用恩仁民亦用恩愛物亦用恩也推恩則有次第故曰古人必由親親推之然後及於仁

民又推其餘然後及於愛物云云 今王反之則必有故矣故復推本而再問之註此推本與前面反其本而推之之本不同蓋即是上文故字也推字亦不同此易見

權然後知輕重

更定次序移三條入下題藏六十二字

上文既發其端曰今恩足以及禽獸而功不至於百姓者獨何與分明是含說箇輕重長短之當度在裏面蓋齊王正是輕重長短之失度者 權雖解作稱

鍾度雖解作文量然實當作活字看或曰如此則度字當作入聲曰還作去聲不害為活字

心為甚

斐二條

果何以見心之當度尤甚於物處曰試論今有一匹布不用丈尺以二丈為一丈只是這一匹布上失耳若夫君於民物之間失所權度至於恩及禽獸而功不至百姓則將有所謂庖有肥肉廄有肥馬民有飢色野有餓莩者其比之以二丈為一丈者相去何如

看是甚乎不甚乎 若心之應物則其輕重長短之  
難齊若輕重長短不在心亦不在物在心之應物上  
盖民與物皆物也仁民愛物則是應物也難道物有  
輕重長短又難道心有輕重長短 本然之權度註  
謂當然之理也不容人為者也盖人之一心萬理具  
焉孰為重孰為輕莫不各有本然一定之權度 依  
大註看來只在不可不度上有甚朱子小註二說俱  
小異 上文末句是詰其所以恩及禽獸而功不至

於百姓之故此則承之而言禽獸與百姓孰為當重孰為當輕請比度之一定是百姓重既百姓重王乃恩及禽獸而功不至於百姓其故何哉是豈以三事為快邪然三事實非人心之所快有甚於殺敵釅之牛者於此亦可以度矣此又是一重度了 今恩足以及禽獸而功不至於百姓對言之度也抑王興甲兵危士臣構怨於諸侯然後快於心與單言一事之度也下節以兵興臣危構怨諸侯對敵釅之牛看則

孰為當重且長邪此指以問王之意也

抑王興甲兵危士臣構怨於諸侯然後快於心與變一條

雖正是請王度之處其實又更深一節蓋是言其仁民之心所以輕且短處耳集註分明王之所以功不至百姓興兵構怨累之也王之所以興兵構怨者將以求吾所大欲蔽之也

吾何快於是將以求吾所大欲也

不快於此者心之正也而必為此者欲誘之也兩此

字同都指三事尚明於他亦指三事之不快獨暗於此則又指欲之誘與上文此字不同

欲闢土地朝秦楚

必闢土地然後朝得秦楚既闢土地朝秦楚然後中國俱吾所涖而四夷於我乎撫矣涖中國而撫四夷此句又要看一而字似不苟

猶緣木而求魚也

芟一條

緣攀而升本義曰躍者無所緣反看則緣字之義明

矣 木在山魚在水求水物而於山非其地矣恒九  
四之所以田無禽

以一服八何以異於鄒敵楚哉

楚一條

所謂霸必有大國也 今王發政施仁至其若是孰  
能禦之所謂王不待大也

蓋亦反其本矣

臧四字

此與前註反其本而推之又不同 反本只是發政  
施仁其曰使天下仕者即發政施仁有以使之也故



曰發政施仁所以王天下之本也然則盡心力於興  
兵構怨以求王天下抑末矣本字當如此照看 發  
政施仁而王於天下仕者皆欲立於王之朝云云則  
大欲得矣故曰其若是孰能禦之

王曰吾惛不能進於是矣

戒十三字

孟子以為惟保民而王故曰無恒產而有恒心者惟  
士為能若民云云左右是前面意更端而詳言之耳  
此章與孔子答哀公問政一章一般

明君制民之產

今也制民之產都虛說

王欲行之則盍反其本矣

此反其本又與前反本不同註曰使民有恒產者又  
發政施仁之本也是指發政施仁中之大者以為之  
本也如孝弟為仁之本一般都只是仁中事

五畝之宅

芟三條藏二十五字

此言制民之產之法也保民之實事也所謂及人之

老幼而運天下於掌者也 末段獨提老者衣帛食  
肉黎民不飢不寒而不兼收頒白不負戴一意何也  
曰禮義生於富足衣食足則禮義興矣況老者衣帛  
食肉便是少者知所以養之故老者安於衣帛食肉  
而自無負戴之勞亦可知矣聖賢語話自活落然亦  
不至有晦漏或舉重以見輕或提此以該彼不如後  
人文字綳着格子做 此言制民之產之法也 註謹  
庠序之教序於制田里教樹畜之后分明是先使民

有常產然後得有常心所謂然後驅而之善故民之從之也輕意不是教養平說故大註統以為制民之產此一章書通是說王道之易蓋因齊王謂德何如則可以王矣又曰若寡人者可以保民乎哉又曰何由知吾可也皆是難之之辭故孟子答之一則曰保民而王莫之能禦也又引胡齧之言而曰是心足以王矣及明足以察秋毫之末以至天下可運於掌言舉斯心加諸彼通是易得意思至於百畝田五畝

宅然而不王者未之有則所謂保民而王莫之能禦者豈不信哉 自若寡人者可以保民乎哉至是心足以王矣則是言齊宣之可以保民而王者以其有不忍之心也 自百姓皆以王為愛也至是以君子遠庖厨也則於告語之中寓開發之術欲王反求而自得其不忍之心以為保民而王之本也 自王說曰至折枝之類皆以明其決可以保民而王而自不為也 老吾老一條則正言是心足以保民而王之

實而怪宣王不能推之以保民也 權然後知輕重  
一條請王度愛物與仁民孰為當重且長孰為當輕  
且短也 抑王興甲兵以下又明知宣王之興兵構  
怨以致仁民之心輕且短者由於求所大欲其勢之  
不得不重此也故下文反之而示以得所大欲之本  
在於制民之產乃是心足以王矣之實事也

梁惠王章句下

莊暴見孟子

莊暴見孟子見如字特地來見也暴見於王他日見於王曰見音現有因得見也

暴未有以對也曰好樂何如

暴未有以對也意歸在好樂何如上暴問王好樂何如疑有病於治也

孟子曰王之好樂甚則齊國其庶幾乎

戒十一字

通篇之意已具而暴不能再問也故他日見於王云云如孔子答孟懿子問孝曰無違其中正有意在而

孟懿子不能問故因樊遲發之

齊國其庶幾乎

藏四字未條出王語暴題下

言可王也不謂只是能治其國孟子大凡說着與民同樂處便是可王天下如好貨好色好勇樂以天下憂以天下之類是也今有以前只言齊庶幾後乃言可王為疑者非是寡人非能好先王之樂二句意謂不足以瀆賢者之聽也

王語暴以好樂



謂已好樂也

王之好樂甚則齊其庶幾乎

楚三條藏十九字

獨樂不若與人與少樂不若與衆與人與衆所謂甚也  
也就不若字照見得即所謂與百姓同樂者也  
今之樂由古之樂也言但好樂之甚則齊其庶幾不必  
計樂之今古也蓋古樂好之甚固足以王今樂好之  
甚亦足以王分明今之樂猶古之樂也豈過為是無  
據之雄辯而已哉故范氏曰其實今樂古樂何可同

也但與民同樂之意則無古今之異耳而楊氏亦曰  
使人聞鐘鼓管絃之音而疾首蹙額則雖奏以咸英  
韶濩無補於治也蓋咸英韶濩古樂也夫不與民同  
樂雖古樂而無補則知與民同樂雖今樂亦何害二  
氏之言得孟子之旨矣

可得聞與

是欲聞其所以好樂甚而齊庶幾者不兼今樂猶古  
樂不重在此

曰獨樂樂與人樂樂

芟三條藏六十五字

上樂字含有鼓樂意在如芻蕘者往焉雉兔者往焉亦不必有採擊字而自含採擊意矣獨樂不若與人之為甚與少樂不若與衆之為甚

今王鼓樂於此

芟四圖十二條藏一百二十六字

鐘鼓之聲管籥之音猶郊社之禮禘嘗之義互文耳下文車馬之音可見不必拘聲成文者謂之音田獵古者四時之田皆於農隙以講武事獵亦農家之

事故亦謂田與獵逐獸之名也羽旄集註曰旌屬旌總名旄特其屬之一也旌與旗不同旌有毛羽旗只是畫帛

疾首蹙額

楚二條戒四十五字

對欣欣然有喜色看亦是臨時然也上帶聞字此無他不與民同樂也

不與民同樂獨樂耳獨樂不若與人非好樂甚也

吾王庶幾無疾病與

楚一條

民愛其君惟恐其疾病故曰庶幾無疾病與庶幾猶云殆也 吾王庶幾無疾病與何以能鼓樂也夫子聖者與何其多能也中間都着不然二字貼說

此無他與民同樂也

首條戒二十九字

大文此字兼鼓樂田獵而註獨云與民同樂者推好樂之心以行仁政使民各得其所也蓋田獵亦好樂之類也 與民同樂者非同鼓樂也推好樂之心以行仁政云云也下條言好樂而能與百姓同之即是

推好樂之心以行仁政也

今王與百姓同樂則王矣

芟六條藏三十三字湊合

因上文見得王能同樂則天下之民皆歸已而王業成矣豈但其國之民欣欣相告而已哉應上文王之好樂甚則齊其庶幾

齊宣王問曰文王之囿方七十里有諸

芟一條藏一百九字

宣王有四十里之囿當時愛君者或規其制過大而諛佞之臣必有引文王七十里之囿以為之辭者如

陳賈所謂王自以為與周公孰仁且智之類宣王蓋喜其言之便於已也故質諸孟子云 蕃育鳥獸之所註如籠中之雞豈中之豕此只可謂之育不可謂之蕃育蕃育者度閒曠荒野草木自生禽獸自居之地使得以生聚長養而吾時獵取之非惟以為逸豫之資而祭祀賓客之需亦於是乎取焉 稼穡場圃之中註種曰稼斂曰穡又詩註在田曰稼在圃曰穡二說相通蓋種之在田曰稼斂之在圃曰穡 文王

七十里之圃南軒以為文王豈崇圃如此蓋其蒐田所及民以為文王之圃耳以芻蕘得往知其然也愚謂此說似長蓋文王不縱意于田者雖曰三分有二然當時靈圃亦豈至七十里之廣集註曰其亦三分天下有二之後也然則固亦致其疑矣

於傳有之

下有一題一條今芟去

輔氏曰亦言據古書有此說也然未必其然否看來孟子都不肯辯折他只要大處合正便罷如焚廩浚



井之說最宜駁倒孟子亦不之駁只要有象憂亦憂  
象喜亦喜二句便罷

民以為小不亦宜乎

芟一條

蓋文王之囿既與民共其利則囿之所出有限民之  
所取無窮宜乎猶以為小也

殺其麋鹿者如殺人之罪

戒九字

夫殺其麋鹿其罪本不至於殺人者等也齊王輒以  
殺人之罪加之

則是方四十里為阱於國中

楚三條戒十一字

民利其麋鹿也而乃因以殺身是以囿為阱麋鹿為餌也

齊宣王問曰交鄰國有道乎

宣王之時諸侯失睦今日東國來侵明日西國來伐以兵則或不敵以盟則或不信以禮則又或適以示弱而已宣王所以有交鄰之問也況交鄰講好亦先王之令也如梁惠王則東敗西喪幾至於不支但

憤於喪敗故有雪恥之情在齊宣王則與鄰敵相持  
互有勝負宜有息爭求寧之意故問交鄰之道此一  
問亦好意思

惟仁者為能以大事小

仁者以大事小智者以小事大大槩都是忍小忿而  
已 仁人之心寬洪惻怛寬洪故能含容人不恭惻  
怛故能矜人之惡而不較 智者明理義識時勢小  
之事大一則義理之當然二則事勢之不得不然也

此正所謂天者理勢之當然也智兼明理勢仁則惟見理而不見勢勢在己則當忘勢在人則當順智者之識時勢順其勢之在人也仁人之無計較大小强弱之私忘其勢之在己者也樂天畏天之分正在此

文王事昆夷

芟二條藏一百六十八字

文王事見詩大雅註詩綿八章曰肆不殄厥愠亦不隕厥問本謂太王事下文曰昆夷駝矣維其喙矣又

註蓋以為文王之時矣朱子於此亦曰文王事見詩  
大雅非以肆不殄厥愠亦不隕厥問二句為文王事  
昆夷事實也蓋以昆夷事在大雅之綿而因可見文  
王事之畧而已若後篇稽大不理於口章所謂文  
王也乃是謂文王足以當之如上文憂心悄悄愠於  
羣小孔子也孟子亦非以孔子為事實也 按綿詩  
周太王事昆夷猶為以小事大至文王時國勢日削  
則為以大字小矣但太王事昆夷在事獯鬻之後昔

者太王居邠則為獯鬻所侵獯鬻即狄人也及去之  
岐山之下則又為昆夷所擾是兩項事 說仁者為  
能以大事小必曰湯事葛文王事昆夷說智者為能  
以小事大必曰太王事獯鬻勾踐事吳見得大事小  
小事大古之人皆有行之者而今當法而行之也齊  
宣之於鄰國其大者則當以智者之道處之其小者  
則當以仁者之道處之二端之外無餘法矣

以大事小者樂天者也

芟二條戒三十六字

天者理而已矣輔氏曰即程子所謂夫天專言之則道也自然合理故曰樂天不敢違理故曰畏天雲峯胡氏曰字之之心自不能已即是自然合理須味一自字見樂天之意又曰事之之禮尤不敢廢即是不敢違理味不敢字見畏天意制節謹度制字與謹字相對制猶守也自節限也節字與度字相對樂天者無所為而然畏天者有所畏而然

樂天者保天下畏天者保其國

戒一百二十八字合三條為一

樂天者保天下明說做效蓋包含徧覆無不周徧則天下皆翕然歸心矣天下安得不為其保以小事大者不免於有所畏而然能如是則亦可以殄絕人之愠怒而無隙之可乘矣故曰畏天者保其國蓋孟子但論道理都帶箇後效曰保天下保其國真實會保天下會保其國或謂只是論其氣象與規模而已非也其曰保天下之氣象保一國之規模者蓋謂樂天者如何屬以保天下畏天者如何屬以保其國蓋



樂天者包含徧覆無不周徧便是保天下之氣象也  
故屬以保天下也云云且氣象無迹而難量規模則  
有限矣此又朱子用字之意

詩云畏天之威于時保之

只申畏天者保其國若今人立言有此一證無彼一  
證則此一證亦棄了駢麗之弊甚矣

寡人好勇 第二條出下題

勇即小忿也宣王言寡人好勇猶言不能忍氣相似

故孟子曰王請無好小勇 事大恤小註改字小為  
恤小以其理一取音韻之順耳

夫撫劍疾視

芟一條移一條入上題

撫劍按劍也

詩云王赫斯怒

芟四條

密人侵阮徂共

註

密人不是夷狄姑姓之國也阮國

名共阮國之地侵阮徂共密來侵阮已至於共矣

密人不是侵周乃侵阮也但文王是方伯而密人乃

敢擅興師以侵阮是無文王矣故曰密人不恭敢距  
大邦又曰以遏徂莒以篤周祜

書曰天降下民

首條去惟我在三字元非書文

按書泰誓篇述武王之言曰天佑下民作之君作之  
師惟其克相上帝寵綏四方有罪無罪予曷敢有越  
厥志 惟曰其助上帝蓋天能生民而不能使遂其  
生天能賦民以性而不能使盡其性今作之君師正  
賴其能治民使遂其生教民使復其性為有助於上

帝既曰天又曰上帝者帝以主宰言也 寵之四方  
因君師有以助乎上帝故上帝寵異之於四方使之  
高位乎九重之上統有乎萬方之衆而富莫與敵貴  
莫與並矣 饒氏曰書言寵綏四方指君言孟子言  
寵之四方指天而言書之有罪無罪指紂而言孟子  
之有罪無罪指諸侯而言此語皆是但下又云書之  
越厥志指君而言孟子之越厥志指民而言此却未  
安蓋孟子之越厥志亦是但指民凡諸侯卿大夫亦

有稱亂者耳且書言予曷敢越厥志是武王自謂我  
非敢越厥志而僥倖非望也一聽夫命以除暴安民  
耳味有罪無罪惟我在天下曷敢有越厥志之辭  
其氣象嚴毅公大凜凜有不可犯而天下倚以立命  
之意信乎一怒而安天下也

一人衡行於天下武王耻之

斐二條

言天下設有一人作亂而暴民者武王耻之必除之  
以安民也或曰一人衡行於天下謂紂也如此則

集註當有明訓方是衡行不順道而行也 文王武  
王一怒而安天下之民處只從上文看出不須說出  
外來

今王亦一怒而安天下之民

承上文文王武王之一怒安天下而云也故註以王  
若能如文武之為釋之是乃設辭也

民惟恐王之不好勇也

斐一條戒一百九十字

言要他如此也 問孟子既教以一怒而安天下之

民又安在其能事大恤小而交鄰國乎曰此又是一  
意了此章當作兩截看蓋言宣王言寡人好勇則是  
已不能事大恤小矣故孟子又從他好勇處引將去  
不復拘其恤小事大矣故總註曰此章言人君能懲  
小忿云云安天下前段似未有懲小忿意然小國雖  
或不恭而吾所以字之之心自不能已大國雖見侵  
陵而吾所以事之之禮尤不敢廢此非忍小忿而何  
亦見得齊王所以不能事大恤小者正坐此病也故

曰寡人有疾寡人好勇 總註能懲小忿則能恤小事大以交鄰國此節到于時保之住自此以下則是說能養大勇則能除暴救民以安天下又是一截意思了然亦必能懲小忿然後能用大勇能用大勇則自無小忿矣 血氣之怒不可有義理之怒不可無知此則可以見性情之正而識天理人欲之分矣 註同一怒也生於道心者謂之義理之怒發於人心者謂之血氣之怒然理實主乎氣而人心當聽命於道



心也故曰可以見性情之正而天理人欲之分於此乎見矣

齊宣王見孟子於雪宮

芟一條戒五十六字摘二十字入下題

雪宮王之離宮也時王館孟子於雪宮而就見之也  
離宮輔氏曰別在所居宮室之外故曰離宮如漢  
之甘泉唐之九成之類

賢者亦有此樂乎

戒五字第二條出上題

以其非賢者之素有也 小註謂賢者亦樂此其辭

遜賢者亦有此樂其辭驕

孟子對曰有

楚二條畧更次序

此有字正答齊宣王亦有之問是說賢者固有也賢者亦安得有此孟子意以為當得也如答彭更不已泰乎及答公孫丑不素餐兮之意賢者亦有此樂乎孟子曰有然不但賢者有此人皆須有人有不得則非其上矣所以人君要當與民同樂非但當與賢者共之而已蓋雪宮之樂在賢者分上元無許多道

理可說若只管以為當有則賢者似不宜以此為事  
故孟子只用一箇有字答了便罷再不復顧此問只  
引向與民同樂上說道理為正當而切要甚矣孟子  
之善於開導人君也 言人君能與民同樂云云此  
樂註謂皆有此宮室安居之樂也非謂以雪宮與民  
共之乃謂人皆有此樂也 輔氏謂大註君能與民  
同樂則人皆有此樂此釋有之一字非也不可不辯  
最易誤人下註雲峯胡氏却說得明白

不得而非其上者非也為民上而不與民同樂者亦非也

藏九十六字

用上句以陰助下句非是平說也

樂民之樂者民亦樂其樂

芟二條藏五十三字未條湊合

民之樂自是民之樂其樂自是君之樂不要曲為之  
說曰以民之樂為樂此便是君之樂如此則必民得  
遂其樂而後君得遂其樂民既得遂其樂矣又代人  
君之樂也忒要牽強樂民之樂總是與民同樂豈樂

民之樂外人君都不可有臺池鳥獸之樂乎 其曰  
樂民之樂而民樂其樂則樂以天下者蓋樂民之樂  
固見得是樂以天下至於民亦樂其樂此非其樂民  
之樂不足以致之愈見得樂以天下也憂以天下之  
義亦然 樂民之樂者所欲與聚憂民之憂者所惡  
勿施也 樂以天下憂以天下謂不以已也此天下  
字正如君子不以天下儉其親之天下同故曰不以  
已也

吾欲觀於轉附朝儻

轉附朝儻盖旁西北近齊國都海在其南故曰遵海而南琅邪則其東南境上邑名也海皆在東南地方吾何修而可以比於先王觀也

盖嘗聞有省方觀民之說矣不然無此問也然至於大戒於國出舍於郊興發補不足則所謂欲觀於轉附朝儻放於琅邪者皆不果矣

天子適諸侯曰巡狩

芟五條戒一百七十七字

天子適諸侯曰巡狩又必曰巡狩者巡所守也諸侯朝于天子曰述職又必曰述職者述所職也是非訓解之辭正以見一為巡諸侯所守而行一為述所職於天子而行是皆非無事者省耕省斂天子諸侯都有此法都是先王之制也是又在巡狩述職之外不是巡狩述職就便省民以補不足也天子只是省其畿內於天下則但巡狩以考其田野之治否老幼之得養與否而為之賞罰耳上言巡狩述職只說

得非無事而空行說恩惠及民不得恩惠及民須是  
補助不足故夏諺只可帶省耕省斂說不可通帶上  
文省耕省斂天子諸侯皆然夏諺獨言王者蓋畿  
內之諺也孟子引以為證則不拘於諸侯耳問遊  
與豫如何分曰無分問何以重言之曰此詩歌體也  
蓋歌詠故反覆重復其辭而不為厭也其實遊便樂  
也遊豈有不豫者哉豫豈出遊之外哉若說豫是不  
必出遊而樂凡在宮室苑囿皆豫則在宮室苑囿難



於施恩惠及民也吾王不豫吾何以助分明是省耕斂而助不足者也或曰省耕省斂為民事也非遊豫也而乃以為遊豫何哉曰巡狩述職亦豈遊觀也哉而孟子乃以答遊觀之問何與故省耕省斂亦說得遊豫

今也不然師行而糧食

第三條六條出下題更定次序

言君行則師從師從且糧食非惟供億之費民實出之而夫征之擾民實供之故飢者弗得食勞者弗得息左氏曰君行師從卿行旅從師宇當如此認故

大註曰二千五百人為師 糧謂糗糒之屬註糗熬

米麥也糒乾飯也 按饒氏曰君之行也以師其食

以糧如此則只是人君食糧矣愚嘗笑而駁之曰恐

糗糒之屬非當時食前方丈之諸侯所能甘矣 暵

暵胥讒就是民乃作慝也 胥相也共也胥讒非交

相怨謗也謂相與謗怨也與聿來胥宇之胥宇同

方命虐民

臧十九字移二條入上題

大註方逆也按書經方命圯族傳曰方命者逆命而

不行也 若流如水之流無窮極也此與從流下而忘  
反謂之流者不同從流下分明是放舟隨水而下以遨  
遊也乃實事也 若流之流水流也流連之流舟流也  
從流下而忘反謂之流

此釋上文之義也是晏子自釋也直至惟君所行也  
皆述晏子之言至景公悅以下則兼述其事 從流  
下而忘反謂之流順水而下固謂之從流逆水而上  
如何亦謂從流蓋從不訓順乃訓逐也從流下自上

逐流而下也從流上自下逐流而上也下句從獸之  
從亦是逐也 言廢時失事註廢時指荒失事指亡

其上文開兩段解曰從獸田獵也荒廢也樂酒以飲  
酒為樂也亡猶失也此則總言之曰廢時失事也

先王無流連之樂

戒十二字

言先王之遊非巡狩則省耕省斂也是無流連之樂  
荒亡之行也不必拘述職也 或曰是為先王之法  
如此則兼得述職意

景公說大戒於國

大戒於國謂布告境內以圖回治政也如今政令凡一切勞民傷財之事悉皆停免凡一切奸宄情弊之事盡行禁革凡諸利於國利於民之事盡許陳納無隱之類蓋人君但有志於圖回政治便須有一番告命以彰境內之耳目也出舍於郊自責以省民也蓋以示不敢安居深宮之意且於省民之不給為便也省民者省民之耕歛也故出郊但不知其出舍之

時為春為秋耳此則不必求者也 興發舉發也

為我作君臣相說之樂

楚一條藏二十三字

君之悅臣只用上文景公悅悅字是了然景公之悅晏子而悉以其言見之行事如此則晏子之悅景公又當如何邪此可以想見矣是晏子之悅其君當在大戒出舍之後不必就以上文善哉問以下為臣悅其君也

蓋徵招角招是也

戒五十八字更定次序

此一句是孟子述事之言當孟子時此樂蓋猶在也

故孟子舉以實之 言今之所傳徵招角招是其樂也 每一音之樂皆須具宮商角徵羽如徵招之內固有宮商角徵羽角招之內亦須有宮商角徵羽也 此之徵招角招者又是箇大角徵也蓋五音旋相為宮 樂有五聲獨舉徵招角招二者以角為民徵為事取其切者也景公一場作樂必不止此二音之樂而已或者當孟子時只有此二音之樂在其他亡失不可知故特舉其見存者邪 其曰招者舜樂也當

時韶在齊齊景公蓋用之而被以新詩故其樂亦謂之韶也 其詩徵招角招之詩也補當朱子時無可據了故兼言徵招角招之詩或只是角招之詩或只是徵招之詩耳

畜君者好君也

芟一條移一條入上題

又是孟子解此詩此解極有意 畜君者好君也既出於好君夫何尤哉如此說方見是釋詩意

齊宣王問曰人皆謂我毀明堂



趙氏曰明堂太山明堂周天子東巡狩朝諸侯之處  
註只此二句是趙氏之言下云漢時遺址尚在即不  
是趙氏說了蓋趙氏漢人也不應自說漢時遺址尚  
在按天子巡狩隨方之鎮山各設明堂此之明堂  
趙氏何以知其為太山明堂也曰以其在齊境內也  
漢時遺址尚在輔氏曰出漢書郊祀志武帝元封  
元年封泰山泰山東北址古有明堂處愚謂集註此  
句亦足以證齊王因孟子之言而不果毀也


明堂

文獻通考曰孟春之月天子居青陽左个仲春之月  
天子居青陽太廟季春之月天子居青陽右个孟夏  
之月天子居明堂左个仲夏之月天子居明堂太廟  
季夏之月天子居明堂右个中央土天子居太廟太  
室孟秋之月天子居總章左个仲秋之月天子居總  
章太廟季秋之月天子居總章右个孟冬之月天子  
居玄堂左个仲冬之月天子居玄堂太廟季冬之月

天子居玄堂右个 愚按以玄堂對明堂觀之則知  
明堂者何明之義不如先儒所謂彼此通明之說也  
又曰上員下方八窓四闥布政之宮故稱明堂周  
公祀文王於明堂夏后曰世室殷人曰重屋東西九  
筵南北七筵堂崇一筵五室凡室二筵蓋之以茅

又曰晏子春秋曰明堂之制下之潤濕不及也上之  
寒暑不入也 又曰明堂者通明之堂也所以朝諸  
侯行王政者在是所以享上帝配祖考者在是非七

筵九筵之修廣不能行也五方四隅亦惟辨其方正  
其位隨行者所居之月掌次以帷幕幄帟為之以詔  
王居以順月令以奉月令之五人帝五人神所以配  
食四郊也 通鑑綱目漢武帝建元元年迎申公為  
太中大夫條集覽曰孝經援神契云布政之宮在國  
之陽上員下方八窓法八風四閤法四時九室法九  
州十二重法十二月三十六戶法三十六旬七十二  
牖法七十二候



隨其時之方  
位開門須是  
八憲四闔方  
是俗謂玲瓏  
憲也

議者但以為非一統之王者不宜居此故欲毀之以  
臣論之三如欲行王政則亦可以王而明堂即王之  
所居矣何必毀哉

王曰王政可得聞與

蓋王雖未能必行王政而實不能無羨慕於主天下  
也故曰王政可得聞與

昔者文王之治岐也

八家各受私田百畝而同養公田

註養去聲事也

澤謂瀦水梁謂魚梁

註

饒氏曰澤是水所都處梁是水

所通處水所通處正可絕流而漁故以為魚梁也

趙氏惠所論鰥寡孤獨之序及其字義不必盡從惟鰥字為有義以孤為顧以獨為鹿皆所不可知

文王發政施仁必先斯四者

芟一條藏十三字

或謂發政施仁指上文耕者九一至罪人不孥非也發政施仁是虛字先之者重之也亦非先恤窮民而後行九一世祿之法也人君不發政施仁則已一行

仁政便是此數者尤在所宜留意耳故曰尤宜憐恤  
必以為先也此先字亦如後義先利之先字不可拘  
以時之先後為言也 凡民之老幼文王則導其妻  
子使養其老而恤其幼鰥寡孤獨之人則無父母妻  
子之養而官養之者也

詩云哿以富人哀此玃獨

藏十八字

玃詩作惇音相同大夫憂亂而作首章正月繁霜此  
第十三章曰仳仳彼有屋蔌蔌方有穀民今之無祿



天天是掾胥矣富人哀此惻獨只此四句見得文王當時治岐舉許多等人都區處得當了大學曰君子賢其賢而親其親小人樂其樂而利其利此以沒世不忘也

乃積乃倉乃裹餼糧于橐于囊

芟二條四圖藏五十八字

此言公劉之民富足如此也以此推之非公劉好貨而能推己之心以及民不能其實不見得公劉好貨處積無屋而露積也倉屋以貯之者也餼乾糧

也詩傳與此不同曰餼食糧糗也又分作二字看大抵或合看或分看總是乾糧也 橐囊皆袋也無底

曰橐何以裹糧盖如今布袋兩頭皆可入穀乃並結束而載之背者也今北方常用之 干楯也自關而

東或謂之干或謂之楯關西謂之楯戈秘長六尺有六寸戈主於刺戚揚二者斧鉞之別名戚為斧揚為鉞鉞大斧小 詩上文言篤公劉匪居匪康言公劉逼於戎狄而不遑安居也繼曰乃場乃疆言帥民以

勤事農畝也繼曰乃積乃倉言田畝有秋或露而積之或倉而貯之也于焉遂裹餼糧于囊橐之中言有行齎之具矣於是思安集其人民以光大其國家而有弓矢干戈戚揚之悉備于以往遷于邠焉蓋公劉之居邠被西戎之侵擾民不得安堵而國亦以弗振故曰思安集其人民以光大其國家也

來朝走馬 奔狄人之難而來急也

爰及姜女聿來胥宇

芟一條

盖同時率西水潞而至于岐下也盖太王是避狄人之難而去不忍委其民而與之偕豈使其妃獨後乎不可因上句古公亶父來朝走馬為初只太王獨來而不察爰及姜女之一句為並至而共居也

當是時也內無怨女外無曠夫

楚五條賦二十七字

亦無事實據證然以太王之德必能如此無疑也

究公劉之好貨止於乃積乃倉乃裹餼糧而已他無所謂好貨也究太王之好色亦止於爰及姜女聿來

胥宇而已他無所謂好色也然則亦所謂其爭也君子雖然乃積乃倉乃民之貨非公劉之貨也爰及姜女乃天理人情之當然太王豈可委其妃而獨行哉然則亦何好色之有孟子特權辭耳使齊王好貨好色而止如此庸何害乎而況與百姓同之吾於此章見孟子之不得久於齊者矣蓋宣王聞孟子王政之言而善及激之使行則曰寡人有疾寡人好貨孟子告之以王如好貨與百姓同之於王何有在王亦

可以自厲矣乃曰寡人有疾寡人好色侯孟子又告之王如好色與百姓同之於王何有乃竟不聞其見之行事焉何哉此所謂王之不王不為也悅而不繹從而不改孟子且奈何哉 楊氏曰孟子與人君言皆所以擴充其善心此擴充二字與孟子所謂擴充正意不同然亦是自其善端而導之也 不止就事論事每因論事而格其心也 皆天理之所有而人情之所不能無者也七情亦皆天之所賦也人皆知

鐘鼓苑囿遊觀之樂云云之為人情而不知其亦天  
理也故朱子兼之曰云云 天理人欲同行異情愚  
以為只係能推與不能推之間耳推之功用亦大矣  
哉若論好處大槩亦同也但公劉太王好之而能推  
齊王則但好之而已故曰古之人所以大過人者無  
他焉善推其所為而已 循理而公於天下者聖賢  
之所以盡其性也縱欲而私於一己者衆人之所以  
滅其天也循理謂之盡其性明其非有所加也縱欲

謂之滅其天甚其縱欲之罪也天即理之所從出也  
是非得失之歸歸字重看是而得者歸於王非而  
失者歸於亡差毫釐而謬千里也 其法似踈而實  
密其事似易而實難輔氏曰法指孟子之說事指公  
劉太王之事 則有以識其非曲學阿世之言蓋以  
好貨好色之類皆不之禁而反導之以與民同古聖  
賢俱未有此說似若近於阿世者矣然其意則欲時  
君就人欲上行天理也故又曰知所以克己復禮之



端云端者言下克已復禮之工夫自此始也蓋已之與禮所謂同行異情幾微之際者也克已復禮之端只是強恕而行所謂推已及民也

王之臣有託其妻子於其友而之楚遊者

比其反也則凍餒其妻子非是自楚反彼乃凍餒其妻子蓋反之日乃知彼之凍餒其妻子也則如之何托以妻子者當何如處也棄之絕交也

士師不能治士則如之何

楚二條藏十六字畧更次序

言當何以處之也已之廢之也

四境之內不治則如之何

四境之內不治或治道乖方而邑里之蕭條或教化陵夷而風俗之薄惡直說在王身上受人之托妻子而不免凍餒之者固不得辭其責矣為官長而不能治其屬者亦不得辭其責矣四境之內不治人君獨得以辭其責乎一則曰棄之二則曰已之固矣四境不治已獨且奈何哉此孟子諷切齊王之意也

亦可謂直而近於慙矣所謂良藥苦口而利於病忠  
言逆耳而利於行愛之也深則其告之也切古之人  
有面對其君不如桀紂不如桓靈者又高允每直言  
於魏主屏人切諫至有魏主所不忍聞者矣他只是  
愛君而已此亦可以想見古人正直之遺風若在今  
日則所謂君日驕而臣日諂者雖科場文字亦動輒  
云今幸有聖人在上或云何幸躬逢其盛甚者輒以  
超三皇邁五帝為說此是何等意趣 茅焦對秦始

皇謂桀紂之暴不至是也晉劉毅謂武帝不如桓靈

王顧左右而言他

芟二條芟中摘十字加末條之上

使不憚於自責則必曰此則寡人之罪也使不耻於  
下問則必曰如之何而四境可治寡人願安承教也  
而惟顧左右而言他其不治之責固無得而諉也祇  
以見其甘於不君而不辭耳此孔子所謂吾未如之  
何也已矣 上二事皆是設言以發之趙氏總註頗  
失輕重

所謂故國者非謂有喬木之謂也

艾五條臧二十一字

喬木世臣皆故國所宜有註蓋古人立國凡廟朝壇  
壝宮府及臺榭之所皆必植之名木如三槐九棘之  
類歲數既久則成喬木是亦故國之一證也若新造  
之邦亦安得有此 今人槩指喬木之類以為故國  
立證殊不知故國所重在人不在物也 大凡有為  
之君必有親信之臣堯舜之於禹臯輩君臣日相都  
俞吁咈於一堂之上而無間然湯之於伊尹高宗之

於傳說武王之於周召無不皆然下至霸者如桓公  
之於管仲景公之於晏子其君臣相得之情亦可考  
矣後世如漢高之於蕭何一不在左右則如失左右  
手於韓信初間解衣衣之推食食之光武之於鄧禹  
嘗與同卧唐太宗之推心房杜或剪鬚和藥賜功臣  
太祖雪夜幸趙普第至於我太祖之作大誥三編亦  
托始於君臣同遊蓋皆有見乎此此理斷不可誣也  
昔者所進補此進字不是泛泛進用蓋視其所親

幸而將倚以為腹心者故以不知其亡為無親臣也  
若是百僚庶官之中有今日進而明日亡去亦何怪  
得王之不及知也

王無親臣矣況世臣乎

戒七十一字

然則安在其為故國 世臣累世勲舊之臣註蓋自  
其先世有大勲伐於國家而又代有聞人世其祿位  
與國同休戚者也

國君進賢如不得已

芟二條 戒四十一字更定次序

所謂如不得已非真有不得已者以其審了又審三番五覆審之而後始從而取之有似乎不得已而進之者如不得已最形容得真切若輕信而遽用之有如不得已意乎 以下文觀之左右皆曰賢若可矣猶未也諸大夫皆曰賢可矣又未也至於國人皆曰賢可矣又必自察之然後進而用之其審之又審畧不少苟如此真若意不欲進而不得不進者 將使卑踰尊踰踰戚其可苟哉是恐今日所進者不賢後



來又更著賢而親疏尊卑有易位者耳此是懲前而戒後也故曰將使 蓋尊尊親親禮之常也於此不謹而誤用之則既在尊親之列矣他日未免使卑踰尊疏踰戚而越常理故不可不慎也

左右皆曰賢芟四條藏一百四十三字更定次序

進賢如不得已如此有不識其不才而誤用之者乎  
左右皆曰不可勿聽云云者誠恐其失賢也恐其失賢者正欲其得真賢也 不進則是退矣故以不

可者與之平衡論而皆歸於進賢也不可謂退是退  
在位者如此則又有退人如不得已一脚了故註云  
如是則於賢者知之深任之重而不才者不得以倖  
進矣所謂進賢如不得已者只說就一邊 見賢焉  
然後用之則後日自不至於卑踰尊踰踰戚矣見不  
賢焉然後去之則今日既無倖進之失後日亦無踰  
等之患矣 左右皆曰可殺此條不可依南軒新安  
帶連上文進退人才言不可而甚者則殺之集註明

曰此言非獨以此進退人才至於用刑亦以此道分明界斷了 上文因說進賢却形出一箇退的來說此條只說可殺者亦就藏得一箇不可殺的在裏許 盖國人曰不可殺或察之見不可殺則不殺矣 大註天命指進退人才言天討指刑殺言如何以退人才亦為天命有德邪曰有進便有退以此相形言耳 意重進賢退只是不用不可謂之天討 若下文民之所惡惡之則兼去之殺之

齊宣王問曰湯放桀武王伐紂有諸

湯放桀武王伐紂此一問亦可以窺見齊王之志矣  
蓋齊宣王素以辟上地朝秦楚涖中國撫四夷為心  
實有滅東周而自帝之意故發此問邪孟子之言其  
所以警齊王自省君德之意又有出於其意外者

賊仁者謂之賊

芟二條藏四十字

賊仁者其心忍故註曰凶暴淫虐滅絕天理賊義者  
其事乖故註曰顛倒錯亂傷敗彝倫 朱子曰傷敗

彛倫只是事錯而致敗倫耳天理之在心者猶未至  
盡滅也仁是天理根本處賊仁則大根本虧滅了  
便是殺人底人一般故謂之賊賊者害人之名

聞誅一夫紂矣

楚一條

孟子是以誅字換了弑字一夫字換了君字大抵  
天生斯民而立之君者欲其主張此綱常所謂皇極  
主也今既賊仁賊義則人道絕而自失其所以為君  
者耳故湯武之兵謂之為天下除殘賊不謂之弑君

也

為巨室則必使工師求大木

前段是譏其不任賢下段是言愛國者必任賢王不任賢則其視國家為何如是愛國不如愛玉矣兩段意自相叫應

則王喜以為能勝其任也

芟一條

謂大木勝巨室之任也不謂工師勝任先儒謂任賢不如任匠非是不如任匠乃是不如任木也

夫人幼而學之壯而欲行之

未條藏六字湊合

幼而學者仁義也故壯則欲行夫仁義今王曰姑舍  
女所學而從我是欲令舍其所學之仁義而徇吾所  
欲之功利也 賢人所學者大註道之大者不外於  
仁義也此孟子之所謂學也故曰所學者大也亦緣  
上文求大木字照出

今有璞玉於此雖萬鎰必使玉人雕琢之

萬鎰言其價直之小也 以萬乘之國而視萬鎰之

玉其輕重較然矣萬鎰不為少而何

則何以異於教玉人雕琢玉哉

楚三條藏三十七字

此教字是命字之義言玉則教玉人琢之而國家則不使賢者得伸其志以治之豈非愛國不如愛玉哉

舊說玉人自有治玉之法不待人教之猶賢人自有治國家之法不用人君教之故曰云云此說雖得教字穩然於愛國不如愛玉意將晦了 戰國策趙孝成王篇公子魏牟過趙趙王迎之反至坐前有尺



帛且令工人以為冠工見客來也因避趙王曰願聞  
所以為天下魏牟曰王能重王之國若此尺帛則國  
大治矣趙王不悅曰寡人豈敢輕國若此魏牟曰請  
為王說之王有尺帛何不令前郎中為冠王曰郎中  
不知為冠牟曰為冠而敗之奚虧於王之國而王必  
待工而后乃使之今為天下之工或非也社稷為虛  
器先王不血食而王不以予工乃與幼艾此所謂令  
即孟子所謂教也 饒氏曰兩箇譬喻是兩意前是

譬任賢不如任匠后是譬愛國不如愛玉此說雖未  
得孟子兩喻相貫之意然猶未甚失至新安陳氏以  
為前譬王欲小用賢者后譬王不專用賢者則全不  
識孟子意矣 前段都是姑舍女所學而從我不知  
新安何以說上是小用賢者下是不專用賢者果何  
所憑

齊人伐燕勝之

按史記燕王噲讓國於其相子之云云史記是作湣

王入於此不識其異者識在下條也

宣王問曰或謂寡人勿取

大註曰以伐燕為宣王事與史記諸書不同已見序  
說此註宜於上條就入乃留置於此者何曰以宣王  
字於此可見也故於此識之

孟子對曰取之而燕民悅則取之云云

齊王意欲取之而托天以為辭孟子之意則曰觀天  
命者當於民心今民心皆未肯歸齊未見得是天以

燕與齊也故曰取之而燕民悅則取之云云若欲民心之歸則須是以仁易暴蓋以齊萬乘之國而伐燕萬乘之國彼燕之民簞食壺漿以迎齊之王師豈有他哉為燕所虐而望救於齊耳王於此時正宜發政施仁以大慰燕民之心可也若更為暴虐如水益深如火益熱則民將轉而望救於他人矣齊焉得而強取之哉

取之而燕民不悅則勿取

芟五條藏四十二字畧更次序

不可謂文王欲取商以商人不悅而止文王初何心哉時未可取文王自然不取初無覬覦之心也蓋三分有二商民猶有未歸心者畢竟文王三分天下有其二還是天命未絕商而夫子以為至德者蓋在他人則必舉大事矣不然亦以有二者自有矣而文王乃復以之而事商焉是亦可取不取可為不為而為至德也若使諸侯不期而會者八百雖文王亦安得而止之哉故曰堯舜湯武其揆一也以萬乘之

國伐萬乘之國補按此一條分明是說齊未能得燕  
民之悅而未便有可取之理其曰如水益深如火益  
熱蓋已窺見其將有殺其父兄係累其子弟毀其宗  
廟遷其重器之意矣然當時猶未有其事方是始勝  
之日也 如水益深如火益熱此如字是假如之如  
非如似之如也即集註若更為暴虐之若字 蓋以  
上條觀之固未見得民悅齊亦未見得民不悅齊故  
此條勸以行仁政猶或可取也及齊不行仁政而更

為暴虐致煩諸侯之兵孟子乃轉教以置君而去蓋  
是時已失燕人之心矣無復可為者矣二章之旨所  
以為不相悖

齊人伐燕取之

不用孟子上章之言也 何以待之謂何以備之也

東面而征西夷怨南面而征北狄怨

戒九字

只曰東征西怨南征北怨可也必曰西夷北狄何與

舉其遠者言則近者可知也 書之言至奚為後我

止自民望之以下孟子申言也謂當湯未至時則民望之若大旱之望雲霓及湯既至則歸市者不止耕者不變誅其君而弔其民若時雨降民大悅矣故又提書曰後我后后來其蘇見得以上是孟子之言也滕文公下篇亦然

若大旱之望雲霓也

芟六條減三十三字

大註雲合則雨虹見則止若望雲者仰其來也若望霓者又疑其不來也只是願其雨而又恐其不雨故



只管望看是雲是霓耳差之毫釐便失其旨而與大  
早之望雲雨者異意矣宜細酌之 霓虹也單言則  
同對言則分 詩孔氏註曰雙出色鮮盛者為雄曰  
虹暗者為雌曰霓

如之何其可也

斐一條

今燕虐其民王往而征之民以為將拯已於水火之  
中也若殺其父兄係累其子弟毀其宗廟遷其重器  
則是覆燕以自利而已安在其為拯民於水火之中

也故曰如之何其可也

今又倍地而不行仁政

減一百六十一字

若倍地而行仁政如何曰連倍地已不是了緣當時齊已取燕了故孟子只重仁政上不復咎其倍地也

齊之取燕若能如湯之征葛則燕人悅之而齊可為政於天下矣註言齊之取燕若能如湯之征葛誅其君而弔其民則燕人無不悅而齊可王矣此亦以既倍地了言既動天下之兵了而為之計則須是

置君而去若只施仁政亦晚矣若初間倍地而行仁  
政則燕民戴之諸侯亦無釁可乘王速出令反其  
旄倪云云蓋當時諸侯謀伐齊者以齊之殺燕父兄  
係累子弟等為辭也故教以反其旄倪止其重器云  
云蓋只論曲直未暇論強弱之與勝負也所謂理之  
可為者不過如此反其旄倪旄去聲與耄同九十  
曰耄

則猶可及止也

玆二條減四十七字

當時齊王惟恐無以止之非惟燕終不為己有而故物亦恐不能保也

鄒與魯閼

臧十六字

閼鬪聲也註閼本謂聲之閼閼也不着鬪字解不來故云吾有司為我死於敵者三十三人而民皆莫肯為有司致死民之不用情於其長上如此吾欲誅之則人衆不可盡誅若宥之而不誅則疾視長上之死而不救難為有司者矣然則如之何則可穆公之

問惟知罪民孟子之答則罪有司然上以是施下以是報理之常也且孟子之罪有司者非惟得其情理之實亦所以警動穆公使知所以恤民也

疾視其長上之死而不救

此長上謂有司也註凶年凡疾疫之類皆是飢歲只是歲不熟

是上慢而殘下也

此上謂君及有司也註凶年飢歲君之民老弱轉乎

溝壑壯者散而之四方幾千人矣而君之倉廩實府庫充此君不是也有司莫以告此又有司不是也是上慢而殘下也則兼謂君及有司

夫民今而後得反之也

南軒曰有司視民之死而不救故民視有司之死而亦莫之救所以為得反之也

斯民親其上死其長矣

楚三條藏五十一字

上字仍上註謂君及有司但長字專指有司 盖有

司之所以不恤民者以君之所愛在於財而不在民也是不恤民者固有司之罪而所以致有司之不恤民者則君之咎也君若以愛民之心而行仁政以恤之則有司知體君心而各愛其民矣吾見民於無事之日則皆親其上有事之日則各死其長矣何至疾視長上之死而不救哉新安陳氏曰平時親其上有危難則死其長矣

滕文公問曰滕小國也

戒三十二字

此數章意實相承初因文公問而告以死守後因其問又告以太王之遷及其又問也則合死守遷都而請其自擇蓋理之可為者不過如此 事齊乎事楚乎是欲擇一强者而事之僥倖苟免之計也

是謀非吾所能及也

以其欲為僥倖苟免之計而拒之也

效死而民弗去

斐一條

效死者君之守義也民弗去者由愛民而然也故云



非有以深得其心者不能也 愚嘗疑智者為能以  
小事大而保其國今滕文公欲事齊楚而孟子乃曰  
是謀非吾所能及何與蓋以小事大文公自能之不  
待教也但文公全欲憑大國之援以僥倖旦夕之無  
事而不知有自固之義故孟子獨以所缺者箴之南  
軒曰與其望二國矜己以求安不若思所以自強而  
立國雖曰自強立國然論到道理十全處齊楚還當  
事他當以鄭子產為法

齊人將築薛

一則曰非擇而取之不得已也二則曰君如彼何哉  
蓋當時滕勢危於累卵保民而王又非旦夕可期者  
故只教以遷國圖存

強為善而已矣

楚三條藏一百十二字

此章斷作遷國說方見所謂非擇而取之不得已也  
有著落況君如彼何哉一句尤明言彼今方築薛勢  
已迫矣吾力既莫如之何只得效太王之為善自為

可繼以俟命於天爾所以下章之答亦一邊是遷國  
圖存一邊是守正俟死 夫君子創業垂統為可繼  
也正是遷國圖存之事 為可繼也謂為其所可繼  
者而已 遷都如何見是為善蓋被人侵迫不與之  
較智力以弊其民乃遠避而去之以自圖存其為善  
也孰加於此 苟為善至為可繼也泛說君如彼何  
哉乃是指滕文公說 此章言人君但當竭力於其  
所當為創業垂統為可繼也不可僥倖於其所難必

若夫成功則天也

狄人之所欲者吾土地也

言吾以其志在財幣故事之皮幣又事之犬馬玉帛  
今皆不得免焉然則狄人之所欲者非皮幣也非玉  
帛也非犬馬也是欲吾土地也今吾欲與之爭則勢  
力不敵徒使吾民膏血鋒鏑之下云云

二三子何患乎無君

楚一條戒五十字

依韓文公岐山操曰伊岐有阻我往獨處爾莫予追

毋思我悲云云觀之則是以二三子何患乎無君為  
自有人來君之不是命以從己之詞也而南軒註亦  
云其遷本以全民不敢必民之歸而強之從也民心  
自不釋乎太王耳此其詞雖善其意亦與韓同愚以  
為非也民非后何戴后非衆罔與守邦而曰我往獨  
處爾莫予追何哉故曰無太王之德而去則民或不  
從而遂至於亡可見矣其又忍以其積世之赤子而  
委之狄人哉如此乃屬其父老而告之何為與之訣

別乎夫邠人之不能釋乎太王太王亦自去之矣而  
乃偽為是辭以動之乎古者君民一心況太王之於  
邠人直似子父親戚然明告以去邠圖存之意何嫌  
乎但亦非強之也此須以太王公正之心看之況前  
此公劉之遷都是帥民而去太王乃欲棄其民而獨  
往邪情理俱碍然則所謂二三子何患乎無君此  
言何謂邪曰下句不云乎我將去之便是有君也盖  
當時若不遷去則勢力不敵反成無君矣故曰云云

邠人曰仁人也不可失也

戒六十八字移一條入下題

此是邠人相告勉以急於從遷之詞故曰從之者如  
歸市 仁人也以平昔有德於民言非惟一時所謂  
不以其所養人者害人數語而感得民之樂從也

或曰世守也非身之所能為也

艾三條戒六十九字

言不可輒舍去而遷之他也 既告以太王遷邠之  
事矣乃又曰或曰世守也非身之所能為也效死勿  
去度其不能遷都也故又曰君請擇於斯二者蓋能

遷國以圖存固甚好但恐不能如願則當守義而已  
矣彼僥倖苟免之計誠非吾所能及也所謂理之可  
為者不過如此 守正而俟死者義也註或問義字  
當作經字朱子深是之謂義便近權既對權便用經  
但未及改耳盖板已行故也 東陽曰當時西方地  
近戎狄皆間隙之地非封國之疆界故太王得優游  
遷徙若滕在中國又界大國之間無可遷之地民雖  
或從之亦無所往孟子特舉太王之得民以警文公



耳故下文言效死乃其正也

何哉君所為輕身以先於匹夫者

戒十八字

為如字言君為此輕身匹夫之事云云 本是樂正

子仕於魯孟子至魯樂正子乃以其賢而告於平公  
平公將為樂正子行乃為臧倉所阻是以樂正子入  
見云云而新安陳氏云云乃臆度之說下文自有明  
證何用此臆說為

前以士後以大夫

楚九條戒九十三字更定次序第二條湊合

樂正子亦善說辭意謂其厚於母者時為大夫也非固獨致其厚於母也其不得厚於父者時方為士也非固儉於其父也所以破後喪踰前喪之說故平公應曰否謂棺槨衣衾之美也美字應前踰字蓋以棺槨衣衾人人皆可以自盡隨時皆得以自致固不拘其為士為大夫也而孟子之後喪實美於前喪前喪實不如後喪也故樂正子又釋之曰貧富不同也言時乎喪父棺槨衣衾雖可自盡然而猶貧也則亦稱

家之有無而已及時乎喪母則所謂得之為有財者也故不以天下儉其親而得以自盡其心樂正子只用說前以三鼎後以五鼎而乃先之曰前以士後以大夫者直是要露出士大夫數字以陰折之此非問辭乃因問而解也儀禮圖云三鼎豚魚腊用特豚而以魚腊配之五鼎羊豕魚腊膚用羊豕而以魚腊膚配之

吾之不遇魯侯天也

楚三條戒三十三字

此天字以氣數言 謂氣數未亨吾道當窮故平公  
將行而有臧倉之沮也沮之言雖出臧倉之口然要  
其所以臧倉亦胡為而有是沮也蓋皆氣數之為不  
但孟子之出處制於天而臧倉之一沮亦受命於天  
者也彼何能為哉 味斯言也可見其有樂天之情  
焉孔子曰不怨天不尤人以其樂天知命也此聖賢  
大節也 當時孟子若得遇於平公則吾道以之行  
生民以之泰天下以之治其不遇吾道終不行生民

終不安天下終不治夫以吾道之興廢關生民之休  
戚天下之治亂而乃反制於臧倉一豎子之三寸舌  
有是理乎蓋實丁氣運之衰故生此讒慝及庸君而  
聖賢不得所遇耳遇字更看得重若但以駕乘一見  
為孟子之遇魯侯則孟子平日所遇亦多矣如齊宣  
梁惠相見不既頻邪

四書蒙引卷九